

Powšitkowne WOZJEWJENJA

njedźelu, 10. oktobra 2021

Wusyłanje Božej mše

Serbskorěčnu Božu mšu móža wěriwi tutu njedźelu, 10. oktobra, znova jako livestream w interneće scěhować. Wona přenese so w 9 hodź. z Chróšćanskeje cyrkwy. Link na nju je pod www.posol.de a na wosadneje stronje podaty.

Zhromadny dzeń za džěci 4. a 5. lětnika

Zhromadny dzeń za džěci 4. a 5. lětnika wotměje so wutoru, 19. oktobra, wot 9 do 15 hodź. w Don Boskowneho domu we Worklecach. Zajimcy měli so hač do wutory, 12. oktobra, online přizjewić. Link je pod www.posol.de podaty. Za wudawki dnja zběra so wot kóždoho wobdźělnika přinošk, kotryž wučinja štyri eura.

Za zhromadny dzeń za džěci 1. a 2. lětnika štwórtk, 21. oktobra, njeje hižo móžno so přizjewić, dokelž je kapacita docpěta.

Pomocna akcija za Pólsku

Towarstwo Cyrila a Metoda z.t. chce ze swojej akciju „Łužica pomha“ lětsa znova diecezanski zwjazk Carity w pólskim Elku podpěrać. Tam wjesela so nade wšěm, štož w swójbje trjebaš. Direktor tamnišeje diecezanskeje Carity, prelat dr. Dariusz Krućyński, rjekny, zo su z tym drasta, črije, hygieniske artikle a kosmetika za žony a džěci mjenjene, ale tež płokanski próšk, kuchinske graty, pampersy za džěci runje tak kaž za dorosćenych. Wotedać móža so dary – po móžnosći w měchach – na scěhowacych dnjach pola Špitankecow w Zejicach, Kamjenska dróha 10:

pjatk, 29. oktobra, wot 15 do 18 hodź.

sobotu, 30. oktobra, wot 9 do 12 hodź.

štwórtk, 4. nowembra, wot 15 do 18 hodź.

pjatk, 5. nowembra, wot 15 do 18 hodź.

Pjenježne dary móža so na konto towarstwa přepokazać: Cyrill-Methodius-Verein e.V., IBAN DE 65 750 90 300 000 828 23 66, heslo: „Pólska“. Štóž sej darowanisku kwitowanisku přeje, měł swoju adresu podać.

Bosćanowa wustajeńca w Kamjencu přistupna

Wustajeńca wo česćowanju swjateho Bosćana w Chróšćanskej wosadze je hišće hač do njedźele, 7. nowembra, w Kamjenskim sakralnym muzeju cyrkwy swjateje Hany přistupna. Boži dom je wot pónđzele do pjatka stajnje wot 10 do 18 hodź. kaž tež sobotu a njedźelu wot 11 do 16 hodź. přistupny.

Kemše w Róžeńće

Napjateje personalneje situacije dla su w Róžeńćanskej swjatnicy hač na dalše jeniče jedne njedźelne kemše, a to w 10.30 hodź. w serbskej rěči. Nyšpor w 14 hodź. wostanje.

Čłonski přinošk zapłaćić

Towarstwo Cyrila a Metoda z.t. prosy svojich čłonow, zo bychu lětny přinošk za 2020 a 2021 zapłaćili. Tutón wučinja na lěto pjeć eurow.

Modlenje w Róžeńće

Na modlersku hodžinu před wustajenym Najswjećišim su wěriwi sobotu, 23. oktobra, we 18 hodž. do Róžeńčanskeje hnadowneje cyrkwy přeprošeni. Pačerje spěwać budu so serbsce a němsce.

Termin jězby do Oberammergauwa

Wšitkim, kotřiž su so za jězbu na pasionske hry do Oberammergauwa přizjewili, podam nětko termin. Jězba z busom budže klětu wot pjatka do njedžele, 27. do 29. meje.

J. Špitank

Biskopa Spülbeckowy wizionarny wobraz wo cyrkwi

Smochčanske kubłanišćo swjateho Bena přeprošuje wšitkich zajimcow na seminar wo biskopa Otta Spülbeckowym wizionarnym wobrazu wo cyrkwi a jeho wuznamje za přítomnosť. Tón wotměje so wot pjatka do njedžele, 15. do 17. oktobra, z prezidentom Centralneho komiteja katolikow (ZdK) dr. Thomasom Sternbergom a Drježdžansko-Mišnjanskim biskopom Heinrichom Timmereversom. Pod nadpismom „Jedni we wěrnosci a wjeselu“, hesle biskopa Otta Spülbecka, budu Christian März (Drježdžany), Ralf Miggelbrink (Essen), Joachim Schmiedl (Vallendar) a Peter-Paul Straube (Budyšin) přednošować. Na programje steja tež rozmołwy z časowymi swědkami kaž z emeritowanym biskopom Joachimom Reineltom a bamžowskim čestnym prelatom Bernhardom Rachwalskim.

Wjeršk seminara ma być Boža služba sobotu, 16. oktobra, z biskopom Timmereversom w Budyskej tachantskej cyrkwi. Na njej zahaji wón za Drježdžansko-Mišnjanske biskopstwo wot bamža Franciskusa wuwolany swětowy Synodalny puć. Po tym ma so žurla Smochčanskeho kubłanišća na Žurlu Otta Spülbecka pomjenować.

Hižo popołdnu w 15 hodž. budže na samsnym městnje dr. Thomas Sternberg k temje „Što je naš přinošk za swět? – cyrkej w Němskej před synodu w Romje“ přednošować. Zajimcy za přednošk a kemše měli so přizjewić. Link k tomu je pod [www. posol de](http://www.posol.de) podaty.

Wobrazowe eksercicije

Na wobrazowe eksercicije we wšědnym žiwjenju pod heslom „Skedźbnje do adwenta“ přeprošuje medijowa pedagogowka a duchowna přewodźerka Angelika Kamlage. Wosebitosć je, zo wobdźělnicy při tym sami fotografuja. W pjeć zhromadnych zetkanjach jónu wob tydžeń online přez platformu Zoom sej wobdźělnicy wzajomnje jedyn wobraz předstaja a so wo tym wuměnja. Zdobom dóstanu tam tematiske impulsy, duchowne nastorki k fotografowanju a feedback k swojim dźělom. W času mjez zetkanjemi woni swoje nastate wobrazy samostatnje wobdźělaja. Wuměňenje na wobdźělenju je, zo maja wobdźělnicy swójsku kameru a přistup na Zoom. Přinošk na wosobu wučinja za wšitke pjeć wječorkow 50 eurow.

Zetkanja přenjeho kursa su stajnje pónđzelu, a to 25. oktobra kaž tež 1., 8., 15. a 22. nowembra. Dalša skupina zetka so stajnje wutoru, a to 26. oktobra kaž tež 2., 9., 16. a 23. nowembra. Městna na skupinu su na wosom wosobow wobmjezowane. Link z nadrobnymi informacijemi je pod [www. posol de](http://www.posol.de) podaty.